

四庫全書

子部

欽定四庫全書

子部

山堂肆考卷二十八

詳校官中書臣孫 溶

主事臣祁韻士履勘

總校官降調編修臣倉聖脉

校對官主事臣陳 墉

謄錄監生臣吳裕崑

欽定四庫全書

山堂肆考卷二十八

明 彭大翼 撰

地理

鄉里

輿地提綱鄉之為言向也衆所向也里之為言止也

衆所止也

五州為鄉

周禮大司徒令五家為比使之相保五比為閭使之相

受四閭為族使之相葬五族為黨使之相救五黨為州使之相調五州為鄉使之相賓注云二十五家為閭閭里門也相受言可以相容相託也百家為族五百家為黨二千五百家為州萬二千五百家為鄉相賓言其間彼此有賢能者可用三歲之時相與賓興之

十亭為鄉

漢法十里一亭十亭一鄉迨至李唐以百戶為里五里為鄉

鄉三物

周禮大司徒以鄉三物教萬民而賓興之一曰六德智
仁聖義忠和二曰六行孝友睦婣任恤三曰六藝禮樂
射御書數又鄉大夫以鄉射之禮五物詢衆庶一曰和
二曰容三曰主皮四曰和容五曰興舞

鄉八刑

大司徒以鄉八刑糾萬民一曰不孝二曰不睦三曰不
婣四曰不悌五曰不任六曰不恤七曰造言八曰亂名

五十養于鄉

禮王制凡養老五十養于鄉六十養于國七十養于學
達于諸侯八十拜君命一坐再至瞽亦如之九十使人
受之

六十杖于鄉

禮王制五十杖于家六十杖于鄉七十杖于國八十杖
于朝九十者天子欲有問焉則就其室以珍從

封齋反葬

禮檀弓太公封于營丘比及五世皆反葬于周君子曰
樂樂其所自生禮不忘其本古人有言曰狐死正丘首
仁也

寓衛勸歸

詩邶風式微式微胡不歸微君之故胡為乎中露式微
式微胡不歸微君之躬胡為乎泥中此黎侯失國而寓
于衛其臣勸之歸作此詩

操楚音

左成九年楚鍾儀為晉俘晉侯因使之琴遂操楚音晉侯曰樂操土風不忘本也遂釋之

為越吟

越人莊舄仕楚楚王曰舄越之鄙人今日入楚富貴耳亦思越否使人往聽之乃為越吟

不非大夫

家語子貢曰禮居是邦不非其大夫

與進童子

論語互鄉難與言童子見門人惑子曰與其進也不與其退也唯何甚

敬桑梓

詩小雅維桑與梓必恭敬止

禱粉榆

見社日後人用粉榆字為鄉曲本此

不廢鄉好

左哀八年吳為邾故將伐魯問于叔孫輒輒對曰魯有

名而無情伐之必得志焉退而告公山不狃公山不狃
曰且夫人之行也不以所惡廢鄉注云不以其私怨惡
廢棄鄉里之好也

甚得鄉心

吳魯肅大散財貨甚得鄉里忻心

隱西河

唐登科記段干木隱而西河美李陵降而隴西慚

處高唐

孟子曰王豹處於淇而河西善謳綿駒處於高唐而齊右善歌

勝母朝歌

淮南子曰曾子至孝不過勝母墨子非樂不入朝歌

廉泉讓水

見水

義行見稱

東漢王烈字彥方以義行見稱于鄉里有爭田者將質

之于烈或至塗而反有為盜者曰不辭刑罰乞勿使王
彥方知之故所居號君子鄉

豐約與共

晉中興書何琦尚節義豐約與鄉鄰共之

表正鄉閭

東漢陳寔字仲弓在鄉閭平心率物其有爭訟輒求判
正曉譬曲直退無怨者

索居鄉里

南北朝餘千人陸襄少有大志與鄉里落落不合越州刺史趙政問之襄曰世降道衰人多趨利是以索居政器之

以賦薦帝

漢司馬相如成都人事景帝為武騎常侍以病免客遊梁著子虛賦蜀人楊得意為狗監侍武帝帝讀子虛賦而善之曰朕獨不得與此人同時哉得意曰臣邑人司馬相如為此賦上驚召相如相如請為天子遊獵賦上

大悅以為郎

以賦示人

吳志張紘字子綱作楠榴枕賦陳琳見之以示人曰此
吾鄉人張子紘所作

邑子託翁歸

漢尹翁歸字子兄召拜東海太守過辭廷尉于定國定
國家在東海欲屬託邑子兩人令坐後堂待見定國與
翁歸語終日不敢見其邑子翁歸既去定國謂邑子曰

此賢將汝不任事也又不可干以私

邑子薦買臣

漢朱買臣字翁子吳人也詣闕上書久不報會邑子嚴助貴幸薦買臣召見說春秋言楚辭帝甚悅之拜買臣為中大夫與嚴助俱侍中

號高陽鄉

孔帖劉子玄封居巢縣子鄉人以其兄弟六人俱有名號鄉曰高陽里曰居巢

號樂城鄉

孔帖劉仁軌進爵為公子及兄子受上柱國者三人州黨榮之號所居為樂城鄉

垂組夸鄉

漢武帝以璽書敕責樓船將軍楊僕曰將軍請乘傳行塞因用歸家懷銀黃垂三組夸鄉里

杖節還鄉

後魏董徵以儒學累遷安州刺史因述職過家置酒高

會乃云腰龜返國昔人稱榮杖節還鄉云胡不樂誠子弟曰此富貴匪自天降乃勤學所致耳時人榮之

衣繡畫行

張允為雍州刺史太祖曰還鄉本州可謂衣繡畫行矣

衣錦畫遊

唐中宗時僕射魏元忠還宋州拜掃上幸白馬寺以送之制曰衣錦畫遊在乎茲日散金敷惠諒焉斯辰元忠至鄉竟無賑施議者短之

賢人鄉

魏任旄字子旗樂安傳昌人漢末黃巾起到傳昌聞旄
姓名曰夙聞任子旗天下賢人今作賊那可入其鄉耶
孝子鄉

北史華秋事母以孝聞母喪負土成墳築廬墓側詔表
其門閭後賊起往來于廬之左右咸相戒曰勿犯孝子
鄉

示子孫不忘

見節度使

與耆老相樂

孔帖唐司空圖每歲時祠禱與閭里耆老鼓舞相樂

去家自痛

漢貢禹上書臣犬馬之齒八十一自痛去家三千里
誠恐一旦躋仆不能自還乞骸骨生歸鄉里死無所恨
思鄉轉深

見夏

晉卿入壺關

唐苗晉卿字元輔潞州人為太守入壺關望縣門輒步行或問之答曰公門當下況父母邦乎後秉政

全節過元城

五代馬全節初徙廣晉後過元城衣白襴謁縣官鄉人以為榮

入里門必趨

史記萬石君徙居陵里少子內史慶及諸子入里門必

趙至家按高祖初召奮姊為美人以奮為中涓受書謁
徙其家長安中戚里及景帝時始徙陵里謂茂陵邑中
里也

望里門則步

東漢張湛字子孝為馮翊告歸平陵望里門則步行主
簿曰明公位尊不宜自輕湛曰父母之國所宜盡禮何
輕之有

鄉人所知

世說許允為吏部郎多用其鄉里魏明帝遣虎賁收之
既至帝覈問之允對曰臣之鄉人臣所知也

鄉人所嫉

晉何曾凌駕人物鄉人嫉之如讐永嘉之末何氏滅亡

反貽患苦

東坡志林司馬長卿始以污行不齒于蜀人既而以賦
得幸天子未能有所建明亡絲毫之善以自贖也而創
開西夷逢君之惡以患苦其父母之邦乃復矜其車服

節旄之美使邦君負弩先驅豈詩人致恭桑梓萬石君
下里門之義乎

不宜剽殘

唐李勣微時往從韋城翟讓為盜說之曰鄉壤不宜自
為剽殘

奮懷河東

柳子厚書河東吾土也家世遷徙莫能就緒其間有大
河條山氣蓋關左吾因翹翹褰裳奮懷舊都

散步洛水

邵氏聞見錄司馬溫公判西京留司御史臺遂居洛濱
買園于尊賢坊以獨樂名始與先君康節遊嘗曰光陝
人先生衛人今同居洛即鄉人也有如道學之尊當以
年德為貴官職不足道也公一日着深衣自崇德寺書
局散步洛水堤上因過康節天津之居謁曰程秀才云
及既見公問其故公笑曰司馬出自程伯休父故曰程
因留詩云拜罷歸來抵寺居解鞍縱馬罷傳呼紫衣金

帶盡脫去便是林間一野夫

揚名鄉

五代鄧佑擢童子科第吉擢三禮科改所居為揚名鄉
兩秀里按佑臨江人

累德里

北史紐因字孝政父母亡廬于墓負土成墳墳前生麻
一株其大合拱冬夏常青周武帝表其閭擢授甘棠令
子士雄亦至孝父喪廬墓庭槐枯死服終還家槐復榮

茂周文帝下詔號所居為累德里

居鄉恂恂

論語孔子於鄉黨恂恂如也

去國遲遲

孟子曰孔子去魯曰遲遲吾行也去父母國之道也

里號鳴珂

唐張嘉貞為相弟嘉祐為金吾將軍號所居為鳴珂里

里名甘謗

唐賀德仁兄弟八人居甘謗里太守王伯山改為高陽里

冠蓋里

漢襄陽郡峴山南至宜城百里餘其間雕墻峻宇閭里填列宣帝末至有卿士及刺史二千石數十人同日大會荊州刺史行部見之敕縣名其里為冠蓋里

巾車鄉

東漢馮異初在中車鄉為漢兵所獲

陰鄉

秦樗里子名疾惠王異母弟注云疾居渭南之陰鄉其
里有大樗木故號樗里子

穢里

齊劉繪闕里人為河東相居人有姓賴者所居名穢里
繪嘲之曰君有何穢而居穢里答曰未審夫子有何闕
而居闕里

非詫紳弁

宋韓魏公畫錦堂詩公餘新此堂夫豈事飲燕亦非張
美名輕薄詫紳弁重祿許安閒顧已常兢戰庶幾一視
榜則念報主眷

豈誇軒裳

歐陽永叔寄題相州榮歸堂詩白首三朝社稷臣壺漿
夾道擁如雲金貂爭看真丞相竹馬猶迎舊使君豈止
軒裳誇故里已將鐘鼎勒元勲不須授簡平津客好學
平津自有文

月旦里

東漢汝南許劭與兄靖俱有高名好共覈論鄉黨人物
每月輒更其題品故汝南有月旦評焉今汝陽縣東北
有二許兄弟所居後人因名二龍鄉月旦里

德政鄉

唐咸通中建昌令邵師裕為政以德邑人感之以德政
名其鄉隣境之人慕之多來歸附又以卜隣名鄉取王
翰願卜隣之意

老窮不遺

禮祭義居鄉以齒而老窮不遺強不犯弱衆不暴寡而第達乎州巷矣

守望相助

孟子曰死徙無出鄉鄉田同井出入相友守望相助疾病相扶持

鄭公鄉

東漢鄭玄字康成北海人玄好學學徒至數千百人國

相孔融深敬玄令高密縣為玄特立一鄉曰鄭公鄉開
廣其門閭令容高車號曰通德門

趙公里

宋趙清獻公之里表曰故孝子趙清獻居其里曰孝悌
里

光德里

唐博陵崔邠兄弟六人自始仕至貴達同居光德里一
宅

調元鄉

宋李昉字明遠所居鄉曰調元鄉東釣里

比鄰

周禮大司徒五家為比而遂人又五家為鄰比則親之至鄰則相鄰近也

救災

左僖十三年晉薦饑使乞糴于秦秦伯謂百里奚與諸乎對曰天災流行國家代有救災恤鄰天之道也行道

有福秦于是乎輸粟于晉

禦患

晏子曰君子居必擇鄰可以禦患也

教子擇鄰

孟母事

戒子訴鄰

楊玠初事蜀隨王衍歸後唐後以老致仕歸長安其舊居多為鄰里侵占子弟欲詣府訴玠批狀尾云四鄰侵

我我猶伊畢竟須思未有時試上含元殿基望秋風秋
草正離離子弟不敢言

納鄰娶婦

昔顏叔子嘗獨處于室鄰之嫠婦遇夜暴風雨至室壞
婦人趨而至顏叔子納之使秉燭放乎旦而燭盡束薪
而繼之

挑鄰美女

晉書謝鯤字幼興見鄰女高氏貌美挑之女投梭折其

兩齒時人語曰任達不已幼輿折齒鯤長笑曰猶不廢
我笑歌

乞醯

論語孰謂微生高直或乞醯焉乞諸其鄰而與之

送酒

晉陶侃家貧有友人見過侃無以致誠其鄰人謂侃曰
子門有長者軒車何不延之論當世事侃曰貧不能備
禮耳鄰人密于墻頭送濁醪隻雞遂成終日之歡

爭池

見池

益地

會稽典錄陳囂與民紀伯為鄰伯夜拔藩竊囂地自益
囂見之伺伯去後密拔其藩一丈以地益伯伯覺慙懼
既還所侵又却一丈太守周公高囂德義刻石旌其閭
號曰義里

灌瓜

賈誼新書梁大夫宋就為邊縣令與楚鄰界兩亭皆種
瓜梁人劬力數灌其瓜美楚人竊而稀灌其瓜惡楚令
以梁瓜美夜竊搔之于是梁瓜皆有焦者矣梁亭請其
尉欲報搔楚瓜宋就曰是構怨分禍之道也令人竊為
楚亭夜灌瓜楚亭旦而往瓜則已灌瓜日以美往而察
之則梁亭為也楚令大悅以聞楚王楚王悅梁之陰讓
也謝以重幣而交好于梁王

撲棗

杜詩堂前撲棗任西鄰

連牆不謁

列子與南郭子連牆而居三十年不相請謁

同巷不親

宋包孝肅公與人同巷亦不相親

居側僧珍

梁呂僧珍字元瑜為南兗州刺史初宋李雅罷南康郡
市宅居僧珍宅之側僧珍問宅價答曰一千一百萬怪

其貴李雅曰一千萬買宅一百萬買鄰及僧珍生子李雅往賀亟曰錢一千闔人少之不為通李雅強進僧珍疑其故自發之乃金錢也僧珍言于武帝拜衛州刺史

居近康節

宋富鄭公自汝州得請歸洛養疾築第與邵康節天津居相近公謂康節曰自此可時相招矣康節曰雍冬夏不出春秋時間過親舊間相招未必來不招或自至公謝客誠其子曰先生來必以時見康節一日過之公贈

以詩先生自衛客西畿樂道安閒絕世機再命初筵終
不起獨甘窮巷寂無依貫穿百代常探古吟咏千篇亦
造微珍重相知忽相訪醉和風雨夜深歸

共竈同渠

唐于鵠鄰居詩僻巷隣家少茅簷喜竝居蒸梨常共竈
澆蕪亦同渠傳屐朝尋藥分燈夜讀書雖然在城市還
得似樵漁

透燈分井

宋梅堯臣贈隣居詩壁隙透燈光籬根分井口徐鉉喜
李少保卜隣詩井泉分地脉砧杵共秋聲

牆

釋名牆障也所以自障蔽也

見堯

東漢李固傳舜食則見堯于羹坐則見堯于牆

倚孔

揚子曰或問人有倚孔子之牆誦莊韓之言則引諸門

乎曰在夷狄則引之在門牆則麾之

考父循牆

正考父鼎銘一命而僂再命而偃三命而俯循牆而走

韓客踰牆

宋韓魏公門客踰牆宿妓公因詠竹詩莫遣狂枝亂出
牆客亦為詩莫為狂枝贈斧斤公賜以女妓

連牆而居

見比鄰

負牆而立

唐于頔同中書門下平章事時宦者梁守謙用事有梁正言與頔子敏善敏因正言厚賂守謙求頔出鎮久不報敏怒其給已責所饋誘正言家奴支解之棄溷中家僮上變詔捕頔吏沈璧及他奴送御史獄頔與諸子素服侍罪建福門吏不納屏營負牆立

被文繡

漢賈誼疏今帝之身自衣皂綈而富民牆屋被文繡

置刀筆

東漢王充作論衡戶牖牆壁各置刀筆

千仞

焦贛易林千仞之墻禍不及門

九丈

孟輿北征記鄴城避雷室西南石溝北有華林墻高九丈方圓一里

雲度

杜詩山雲低度牆注云公嘗過友人舍問其牆低友人曰使山雲易度爾

雨侵

柳詩驚風亂颭芙蓉水密雨斜侵薜荔牆

琉璃牆

南州異物志大秦國以琉璃為牆

丹青牆

初學記諸侯牆壁無丹青之彩

壁

釋名壁辟也言辟御風寒也

視壁三年

葛洪神仙傳白和遼東人師事王君王語曰我暫住瀛洲汝止此石壁熟視久久當見壁上文字讀之得仙和視三年方見壁有古人所刻太清經誦之而得仙

面壁九年

初祖達摩與梁武帝議論不合潛回江北止嵩山少林

寺面壁九年摩一作磨

壁中得書

書序魯共王好治宮室壞孔子舊宅以廣其居於壁中得先人所藏古文虞夏商周之書及論語孝經科斗文字

壁上刻文

衡山記甘泉東石壁上有禹所刻文在焉

皆畫烈士

蔡質漢官典職省中皆以胡粉塗壁紫素界之畫古烈士

隱起忠臣

西征記焦氏山魯恭塚前有石祠四壁皆青石隱起忠臣孝子貞婦形像皆刻石記碑文

破壁燎火

魯男子夜大雨有隣之嫠婦因風雨壞屋投棲焉男子乃破壁燎火以達旦

鑿壁引光

漢匡衡字稚主勤于學家貧無燭鄰舍有燭而不逮乃穿壁引光讀書

畫鷄

鎮江府城內興國寺舊苦鳩鵠污佛像唐張僧繇于東壁畫一鷹西壁畫一鷄自是鳩鵠不復入

畫龍

唐張僧繇在金陵安樂寺壁畫四龍不點睛

塗椒

石崇以椒塗壁王愷用赤石脂

加堊

酉陽雜俎唐大歷末禪師玄覽住荊州陟岵寺道高有
風韻人不可得而親張璪嘗畫古松于齋壁符載讚之
衛象記之亦一時三絕玄覽悉加堊焉人問其故答曰
無事疥吾壁也

江祿積錢

梁書江祿為武寧郡頗有資產積銅錢于壁壁為之倒
迕銅物皆鳴人戲之曰此所謂銅山西傾洛鐘東應者
也

佐卿挂箭

益州道士徐佐卿有仙術嘗化鶴飛遊沙苑遇唐玄宗
出獵射之鶴帶箭投西南去歸觀謂弟子曰吾今日遊
山中為飛矢所中以箭挂壁上曰待箭主到此可付與
之後數年玄宗遊蜀入觀中見壁上箭曰此吾沙苑中

射鶴箭也詰之乃知佐卿化鶴故也

相如壁立

見市

孝嗣壁崩

齊徐孝嗣初在帥府晝卧齋北壁下夢兩童子遽云移公牀孝嗣驚起聞壁有聲行數步壁崩

書賦

五代扈載遊相國寺見庭竹可愛作碧鮮賦書其壁周



世宗聞之遣小黄門就壁錄之覽而稱善因拜水部員外郎

吟詩

清異錄臨川李善寧之子十歲能即席賦詩親友嘗以貧家壁試之略不構思吟曰椒氣從何得燈光鑒處分
拖涎來藻飾惟有篆愁君按蝸牛一名篆愁君

藏壁避難

東漢趙岐避難自匿姓名賣餅北海市中安丘孫嵩載

與俱歸藏複壁中遇赦乃出

畫壁記祖

唐漢陽公主性儉常用鐵簪畫壁自記田租所入

山堂肆考卷二十八

欽定四庫全書

山堂肆考卷二十九

明 彭大翼 撰

地理

城郭

崔豹古今注城者盛也所以盛受民物也輿地提綱
城上垣曰堞女牆曰睥樓曰麗譙下有門曰譙門望
樓無覆屋曰櫓城外有池池有水曰隍城之小者曰
堡或曰鄣曰壘有軍屯處曰壁外城曰郭曰郭劉熙

釋名城上垣曰睥睨言于孔中睥睨非常也亦曰睥
言睥助城之高也亦曰女牆言其卑小比之于城若
女子之于丈夫也

却月

荊州記沔陽縣至沔口水北有却月城廬州府無為州
東北有偃月城孫權聞曹兵來乃夾水立塢狀如偃月
一名濡湏塢

奉天

奉天城在西安府乾州唐德宗從術士桑道茂之言廣奉天城及朱泚亂果幸焉

繫水因山

通鑑外紀周成王七年將營成周使召公先相宅三月周公至洛營築謂之王城是為東都方千七百二十丈郭方十七里南繫于洛水北因于郛山以為天下所湊集處制為郊甸方六百里

象天法地

吳郡圖經吳王闔閭使伍子胥相土嘗水象天法地築
為大城四十里小城十里開八門以象八風

空桑

空桑城在陳留縣南帝王世紀謂伊尹生于空桑即此

高柳

塞外有高柳城古詩妾對長楊苑君登高柳城

禦越

董覽吳地記吳王闔閭與越結怨相攻伐因築城名南

武以禦越

拒胡

秦始皇併吞六國問祚于方士盧生對曰亡秦者胡也
始皇不悟已之子名胡亥遂遣蒙恬發兵三十萬并太
子扶蘇同往北方起臨洮至遼東延袤萬餘里築長城
以拒胡暴師于外十餘年

糟丘酒池

大名府濬縣有朝歌城紂故都也其南糟丘酒池漢于

其地置朝歌縣

鼓倡節杵

晉太康記睢陽地方十三里漢梁孝王所築鼓倡節杵而後下和之者稱睢陽曲今之樂家有睢陽曲是其遺音也

斷岸長雲

鮑昭蕪城賦屹若斷岸直聳似長雲

古樹蒼烟

梁吳均吳城賦古樹荒煙幾千百年云是吳王所築越王所遷東有鑄劍殘水西有舞鶴故壩

取旗先登

左隱十一年公會齊鄭伐許潁考叔取鄭伯之旗蜚弧以先登子都自下射之顛瑕叔盈又以蜚弧登周麾而呼曰君登矣鄭師畢登遂入許注云傅子許傅於許城也

懸布復上

左襄十年諸侯圍偃陽主人懸布堇父登之及堞而絕之隊則又懸之蘇而復上者三主人辭焉乃退帶其斷以徇于軍三日注云偃陽懸布以試城外勇者

子囊遺言

左襄十四年楚子囊將死遺言謂子庚必城郢君子曰君薨不忘增其名將死不忘衛社稷可不謂忠乎

仲連射書

秦昭襄王時燕將攻齊聊城拔之或諧之燕王曰燕將

懼誅保聊城不敢歸齊田單攻之歲餘不下魯仲連乃
為書約之矢以射城中遺燕將曰為公計者不歸燕則
歸齊今獨守孤城齊兵日益燕救不至將何為乎燕將
見書泣三日遂自殺聊城亂田單克之聊城本春秋聊
攝地今屬東昌府

石頭必爭

金陵覽古石頭城六朝必爭之地在郡西二里今清涼
寺李王殿是也

錢塘可灌

宋陳亮才氣超邁志存經世隆興初上中興五論不報
退居婺之永康力學著書嘗環視錢塘謂曰此城可灌
也蓋以地下于西湖耳

徙治秣陵

楚威王初置金陵邑因其地有王氣埋金鎮之秦始皇
以金陵有都邑之氣改曰秣陵漢獻帝時張紘因佳秣
陵山川形勝勸孫權以為治所權于是作石頭城徙治

秣陵改號建業晉改業曰鄴又改建康

隨居瑯琊

瑯琊城在句容縣東北初晉元帝以瑯琊王過江國人隨而居之因城焉

封晏

都昌城在萊州府昌邑縣界內齊景公封晏子以都昌
辭而不受即此

徙黃

史記楚徙封春申君黃歇于江東因城吳故墟為都邑
今名黃城

博浪

博浪城在開封府北即張良令力士擊秦始皇處

卑沙

卑沙城在遼東都司城南唐貞觀中張師亮渡海襲卑

沙城即此

敗吳

檣李城在嘉興府西南春秋時越敗吳于檣李吳王傷指卒于此

圖漢

順德府唐山縣西有栢人城皇甫謐帝王世紀謂堯所都也漢初為縣屬趙國趙貫高以漢高祖輕辱趙王敖欲圖之壁人置廁高祖過此縣欲宿而心動問縣何名曰栢人高祖曰栢人者迫于人也不宿而去

盈廬

城在即墨縣東漢武帝封膠東康王子建為皐虞侯因名城為皐虞王莽改為盈廬

平壤

城在遼東鴨綠江東一名王險城即箕子之故國城外有箕子墓漢為樂浪郡治晉義熙後其王高璉始居此城後號西京元為東寧路

張良願封

沛縣東南有留城即張良遇漢高祖處後帝欲封良萬

戶侯良曰臣願封留足矣

仲淹請築

宋种世衡言于范仲淹曰請營故寬州城右可捍延安左可致河東粟北可圖銀夏仲淹為請于朝詔世衡即廢壘興築敵出爭世衡且戰且城及城成賜名青澗

赤甲

荊州圖記魚復縣西北有赤甲城東南連白帝城西臨大江又烏孫大昆彌所治有赤谷城漢元帝時鄧支單

于繁烏孫至赤谷城即此處也

赭圻

赭圻城在繁昌縣西南晉哀帝召桓溫入朝至赭圻有詔止之溫遂築城居此寧國縣南盤山之陰有烏石城

邗溝

吳夫差將北霸中國自廣陵城東築邗城下掘深溝謂之邗溝亦曰邗江江東北通射陽湖西北入淮左傳所謂吳城邗溝通江淮是也或曰漢時吳王濞所都即古

邳溝城後因荒蕪又名蕪城故鮑昭有蕪城賦

仇池

仇池城在鞏昌府成縣西北仇池山戰國時為白馬氏
羌國晉時楊難當三世據此後魏置仇池郡按仇池城
天生斗絕壁立千仞石角外向如雉堞然惟一門可通
內有田百頃泉九十九眼

九連

遼東三萬衛東北卹木川東岸有九連城以其城屬有

九故名

萬安

通鑑長編宋仁宗康定中延州都監周美言于范仲淹曰賊新得志勢必復來金明當邊衝我之蔽也今不亟城將遂失之仲淹因屬美築城數日賊果來美領兵力戰會募援兵不至乃徙軍山北設疑兵賊以為救至引去遂募禁兵築萬安城而還

三戶

南陽府內鄉縣西南有三戶城春秋時晉執戎蠻子畀
楚師以三戶因以名城

八門

八門城在山西汾州城北前趙劉淵遣喬嵩攻西河所
築以城有八門故名

大叔叛

春秋胡傳共城叛大叔

小兒呼

齊宗室蕭景先在江州乘城間小兒呼蕭丹陽武帝即位以景先為丹陽令曰欲驗湓城言耳湓城今在九江府城南九十里漢置柴桑隋改曰湓城

張儀問巫

城都府太城秦張儀所築後又築少城在子城西少城小城也子城即太城初張儀築子城時屢築屢頽忽有大龜出于旁儀以問巫巫曰隨龜築之功果成

遊張遇母

邳州治西南有取慮城漢時汝南步遊張少孤母拾麥相失數年求之不得後遊張為取慮令春月按行高年里遇病嫗問之乃其母也

置監養牛羊

沙苑城在西安府朝邑縣南唐置監于此養隴右諸牧牛羊以供祭祀燕會及尚食取用

輸石衛鄉里

宋上猶人鍾鼎有感于范仲淹義田事偕姪日新置義

莊建書院延師以教鄉族子弟其子三傑登紹興進士
為化州司法叅軍歸值建城盡以家之磚石輸官佐其
費有司以聞賜勅有哲夫成城保衛鄉里之褒

白苧城

松江府有白苧城以有野苧週迴如城也俗呼曰白苧
漚上元縣西北有白下城本江乘縣白石壘城名白下
者以城在白石壘之下也

白草城

塞外有白草城古詩白草城中春不入黃花戍上鴈長飛

衛君居人

吳越春秋鯀築城以衛君造郭以居人淮南子曰鯀作九仞之城博物志禹作三城強者攻弱者守敵者戰城郭自禹始也

增陴浚湟

唐顏真卿為平原守安祿山逆狀已萌度其必反陽託

陰雨增卑浚湟

光狼

光狼城在澤州高平縣境秦白起伐趙取代光狼城即此

和龍

晉成帝時燕築城于營州柳城之北龍山之西南曰龍城穆帝時燕有二龍見于龍山遂命所居新宮曰和龍城後契丹改和龍城曰黃龍府

韓夫人城

晉朱序鎮襄陽符堅遣將圍其城序母韓氏謂曰城西
北角先受其弊乃領百餘婢并城中女子于其角斜築
城二十餘丈賊攻西北角果潰衆將守新城賊遂引退
襄陽人因名曰夫人城

范夫人城

韃靼中有范夫人城城本漢將所築將亡妻率衆保完
之因名

鐵嶺

鐵嶺城在遼東鐵嶺衛治東南接高麗界

銅山

銅山城在四川黎州安撫司城東

玄菟

漢昭帝元鳳六年築遼東玄菟城

白豹

白豹城在慶陽府與西夏為界范仲淹議取此地築城

仁宗康定中元昊寇三川諸砦韓琦使副總管任福領兵七千聲言巡邊部分諸將夜趨七十里至白豹城平明克之破其四十一族及焚積聚而還即此

西安

崔鴻北涼錄沮渠蒙遜等推段業為涼州牧業因築西安城

北平

括地志漁陽郡東南有北平城漢匈奴不敢近右北平

即此

金斗

見池

鐵甕

潤州城號鐵甕吳孫權築唐杜牧潤州詩城高鐵甕橫
強弩

虎林

虎林城在池州府城東孫權封子休為琅琊王鎮虎林

即此

龜山

龜山城在盱眙縣龜山上宋文帝遣將拒魏築城于此

用計款敵

宋慶厯中宣撫使范仲淹議築古細腰城檄知環州种世衡與知原州蔣階共幹其事世衡即起兵會陷于細腰使甲士晝夜築城先遣人以計款敵敵果不爭又召三族豪長犒之諭以官築此城為汝禦寇三族既出不

意又無敵援因遂服從

下令約民

羅立言宜州人為武陽令以能治劇遷河陰立言始築城地在城郭中者皆為富豪大賈所占乃下令盡地使民自築其處吏籍其濶狹號于眾曰有不如約為我更完民憚其嚴數旬工遂畢

千童

輿地志秦始皇遣徐福發童男女千人渡海求蓬萊仙

因築城僑居童男女號卅方城一名千童城今在河間府鹽山縣東北

五公

五公城在保定府滿城縣河北漢王譚不從王莽與五子避難于此光武封其子元才北平侯顯才蒲陰侯益才安嘉侯仲才新安侯季才唐侯因名其城曰五公一名五大夫城

金墉

金墉城在河南郡洛陽故城西北角三國魏明帝所築
元帝禪位于晉王炎出舍于金墉即此

玉壁

玉壁城在平陽府稷山縣西南元魏時築東魏高歡擊
魏宇文泰使王思政守玉壁以斷其歸路歡解圍去魏
徙思政為荊州刺史使之舉可代守玉壁者思政舉韋
孝寬守之

白帝

白帝城在夔州府夔州為周魚復國秦置巴郡漢公孫述僭偽更曰白帝城唐復改夔州十道志述稱白帝者以據西方色尚白也

錦官

錦官城在成都府萬里橋南因蜀有錦官故名猶合浦之有珠官也

婁伯起沙

白氏六帖魏祖征馬超每渡渭為超騎所突營不得立

又多沙不可築城婁子伯說曰今天寒可起沙為城以水灌之魏祖從其言一夜而成

僧孺陶甃

唐主欲于鄂州置武昌節度使鄂城土惡亟壞比歲增築賦茅于民吏倚以為擾牛僧孺請陶甃以成五年工畢鄂人無復歲費

高駢易磚

唐高駢徙劔南西川節度使成都城歲壞駢易以磚甃

陴堞完固負城丘陵悉墾平之以便農桑訖工成未有名駢筮得大畜曰畜者養也濟以剛健篤實光輝日新吉孰大焉文宜去下存上因名大玄城

阿利蒸土

夏主赫連勃勃以叱干阿利湏為將作大匠發夷夏十萬人築都城于朔方黑水之南曰朕方統一天下君臨萬邦新城宜名統萬阿利性巧而殘忍蒸土築城錐入一寸即殺築者而更築之

織錦

西安府永壽縣南有梁山宮秦始皇建宮城皆用文石

名織錦城

覆孟

高郵州城曰孟城其地四隅皆低為沮洳蒲葦之澤城基獨高狀如覆孟故名秦少游詩吾鄉如覆孟地據揚楚脊環以萬頃湖粘天無四壁

馬走

搜神記秦人建城于武州塞將城而崩者數矣忽有馬馳走周旋父老異之因依以築城乃不崩遂名馬邑按地記馬邑屬鴈門郡

鹿游

王歆之始興記含涯有白鹿城晉咸康中郡人張魴作令十年甚有惠政白鹿群游取一而獻之因以名城

下魚

袁崧宜都記佷山縣東有山四面絕壁若城郭然中有

林木池水人田種其上昔晉永嘉之亂土人登此避賊
賊守之經年食盡取池魚擲下與賊以示不窮賊遂退
散因名其山曰下魚城

聚鴨

無錫縣東有鴨城吳王于此聚鳧鴨養之

無憂

無憂城在成都府西威州境內唐李德裕所築吐蕃呼

曰無憂城

永樂

宋神宗時沈括知延州請城永樂詔給事中徐禧往議之即此城在今延安府米脂縣西接宥州界夏人必爭之地也

三牛

三牛城即鳳陽府舊城蓋郡介淮濠多水災牛土畜故以厭之宋郡守梅詢初夢三牛鬪于庭又有人稱相公上謁及得濠州見解有三石牛既而呂夷簡來為倅恍

如夢中

五羊

五羊城在廣州府南海縣漢初趙佗所築吳交州刺史步騭復脩之後為黃巢所焚寰宇記城周回十里初有仙人騎五色羊執六穗耜而至故城名五羊

芙蓉

蜀王孟昶偕擬宮苑城上盡種芙蓉謂左右曰真錦城也

刺桐

泉州府有刺桐城初築時繞城皆樹刺桐

謝安遐想

晉謝安嘗與王羲之登冶城悠然遐想有超世之志李白詩冶城訪古蹟猶有謝公墩想像東山姿緬懷右軍言按冶城在金陵朝天宮後本吳冶鑄之地故名冶城謝公墩亦在焉宋王安石詩我名公字偶相同我室公墩在眼中公去我來墩屬我不應墩姓尚隨公人謂王

與謝爭墩

魏瓘前知

古今詩話魏瓘侍郎初知廣州子城一角忽額見一古
磚有四大字云委于鬼工乃魏字也公感其字大築新
之後罷還未幾儂智高寇廣州外城一擊而圯獨子城
堅民賴以生賊平朝廷以公前知有備加諫議大夫再
知廣州

和戎

武后周以郭元震為涼州都督突厥吐蕃頻歲奄至城下元震于南境夾山置和戎城北境磧中置白亭軍控其要衝拓州境千百里自是寇不敢復至城下

平夏

宋章崇知渭州以夏人猖獗上言請城葫蘆河川據形勢以徧夏許之遂合熙河秦鳳等四路之師陽繕理他皆數十所以示怯而陰具板築守戰之備以城葫蘆河川凡二旬而城告成賜名平夏

不夜

見日

宜春

宜春城在汝寧府城西南漢舊縣晉改曰宜春

會茶

徐州之北有茶城相傳楚漢會茶之所

勸酒

酒城在蘓州壇塘畔相傳吳夫差祭子胥處臨祭勸酒

故名酒一名壇城

九里

九里城在常熟縣北九里故名吳王牧馬于此今有洗馬池

五國

五國城在遼東三萬衛北一千里自此而東分為五國故名去金上京東北一千里又名鶻里改路宋建炎中金徙徽欽二帝于五國城即此

雉城

南陽府城北有雉城秦文公時有陽伯者逢兩童子化為雙雉其雉西飛止陳倉其雌東飛止此故名雉城

螺城

安南乂安府東岸有越王城一名螺城漢時安陽王所築安陽王舊都越地故又稱越王城

邊塞

輿地提綱邊之為言近也言近于外也說文塞隔也

古今注秦築長城土色皆紫漢塞亦然故名紫塞

軒轅丘

山海經窮山際有軒轅丘射者不敢西向畏黃帝之威靈也

元昊宮

陝西寧夏衛賀蘭山之北有元昊宮昔趙元昊據有夏地居興州阻河依山為固因建宮于此

居延城

陝西行都司甘州衛東北有居延城即漢張掖郡武帝使路博德于此築障捍邊又漢中府略陽縣西北有大嶺宋將吳玠于此築壘以拒金兵其傍地名防金平

柔遠城

唐太和中李德裕為西川節度使以南詔入寇民不聊生乃置雄邊子弟築仗義城以制大渡清溪闔之阻作禦侮城以控榮經犄角之勢作柔遠城以扼西山吐蕃復却徠闕以奪蠻險遠民乃安

黃花鎮

鎮在順天府昌平縣東北自是而東至古北口凡四十
關口其關差大者曰大小峪曰白馬關曰陳家峪關曰
吊馬峪關古北口在本府密雲縣東北一百二十里

白楊口

白楊口在昌平縣西凡二十七關至天津關

無定河

無定河在延安府青澗縣東南入黃河一名奢延水後

人因潰沙急流深淺不定故名唐陳祐詩無定河邊暮
笛聲赫連臺畔旅人情亟關歸路千餘里一夕秋風白
髮生

可跋海

可跋海在西番境周回七十餘里東南流至雲南合西
洱河號漾備水又東南出會川為瀘水

李陵臺

外夷哈密衛東南境有高驥山相近有望鄉嶺嶺上有

石龕乃漢李陵題字處又唐地志雲中郡都護府有燕然山山有李陵臺蓋陵不得歸登此以望漢也

蘇武廟

蘇武牧羝處在陝西行都司鎮蕃衛東蘇武山上有蘇武廟

娘子泉

娘子泉在哈密衛畏吾兒河之東胡呼為可敦卜刺

貳師城

貳師城在大宛國其地多善馬漢武帝欲于此地取馬
故號李廣利為貳師將軍

養馬川

川在四川烏撒軍民府城東夷人牧馬于此

飛狐道

道在大同府廣昌縣北入懷仁縣界漢酈食其說高祖
塞飛狐之口及光武建武中盧芳與烏桓連兵寇邊遣
將軍杜茂治飛狐道築亭障脩烽燧以備之即此按飛

狐道相傳有狐於紫荆嶺食松子五粒成飛仙故名飛
狐因名其地曰飛狐道又直隸萬全右衛有野狐嶺勢
極高峻風力猛烈鴈飛遇風輒墮地

熱海

熱海在西域碎葉國東天寒不凍

陰山

見地理山

鴛鴦泊

直隸萬全都司雲州堡西北有鴛鴦泊周回八十里其
水停積不流自遼金以來為放牧之所

螳螂川

雲南府有螳螂川其源自滇池紫廻安寧州治過昆陽
州富民縣入金沙江

鵬鶚堡

萬全都司宣府城東有鵬鶚堡本元雲州之鵬窠

鵬鶚泉

唐李益早渡破訥沙詩破訥沙頭鴈正飛鷓鴣泉上戰
初歸平明日出東南地滿磧寒先生鐵衣

羊腸坂

山西潞州壺關縣東南有羊腸坂長三里盤屈如羊腸

雞頭山

雞頭山在平涼府北崆峒山之西以形似雞故名秦始
皇巡隴西北地至雞頭山過回中及東漢王孟塞雞頭
道即此

石銘陁

陁在大同府靈丘縣西沁水東南流入北陁有石銘其上云冀州北界

金沙江

金沙江在雲南緬甸軍民宣慰司濶五里餘水勢甚盛緬人恃以為險

欽州銅鼓

廉州府欽州有銅鼓古蠻人所用也一說孔明征蠻之

具

交趾銅柱

廣州記馬援征交趾立銅柱為漢之極界交趾人過其下每以石培之遂成丘陵援有誓云銅柱折交趾滅培之懼其折也唐馬總又建二銅柱劉著唐德以明其為伏波之裔一統志所載銅柱在欽州分茅嶺下

桑園河

桑園河在雲南北勝州其源自雲南縣經過州西南桑

園村下流入金沙江又北直隸保安州西南四十里有桑乾河一名灤水自渾源川流至州境與溫河洋河合流東南入宛平縣界為盧溝河蘇東坡詩北渡桑乾冰欲結心畏窮廬三尺雪南渡桑乾風始和冰開易水應玉波

栗林寨

栗林寨在陝西岷州衛南十五里自是而南又有老鼠川等十寨

八達嶺

在隆慶府城南居庸關外

三岔河

三岔河在臨洮府西北一十里

萆麻嶺

萆麻嶺在直隸萬全都司懷安衛城北

首宿峯

唐岑參題首宿峯寄家人詩首宿峯邊逢立春葫蘆河

上淚沾巾閨中只是空思想不見沙場愁殺人西域記
塞外無郵驛往往以峯代驛玉門關外有五峯苜蓿其
一也又云葫蘆河下廣上狹回波甚急深不可渡河上
置玉門關即西境之咽喉也在真定府寧晉縣東南源
自順德府流經任縣至此滙為澤

漫天渦

漫天渦在保州境金太和初更名拂雲平

愛陽河

愛陽河在宣府城北炭山西北本放牧之地深可尺餘
下有頑水黑色者數尺水上有浮草性涼尤宜牧馬生
黃花大如錢人馬蹂踐萎悴明日復生如新

黃龍府

黃龍府即慕容氏和龍城五代時契丹封晉王重貴為
負義侯徙之黃龍府即其地也宋徽宗政和五年金主
攻遼黃龍府次混同江無舟以渡使一人道前乘楮白
馬輕涉曰視吾鞭所指而行諸軍隨之以濟遂克黃龍

府

白馬津

蕭子顯詩遙聞白馬津上吏傳道黃龍征戍兒

青蛉河

雲南姚安軍民府有青蛉河源出三巢山流至府南四十里渚為石地湖周廣二百餘里分為東洶溪西洶溪至府城合流至大姚縣南復東入金沙江

白龍堆

西漢匈奴傳注白龍堆形如土龍無頭有尾高大者二三丈卑者丈餘皆東北向在西域中樓蘭王所居之地

甌脫

西漢匈奴傳東胡與匈奴二國之間有棄地千餘里各居其邊名為甌脫東胡請于冒頓欲有之冒頓怒曰地國之本也不與襲東胡滅之注云甌脫土室也胡兒作于境上以伺望漢人者立王以主之顏師古曰境上斥堠之室為甌脫若今伏宿舍也

候城

漢匈奴傳注漢制每塞要處別築為城置人鎮守謂之候城

拂雲祠

唐玄宗實錄朔方軍北與突厥以河為界河北岸有拂雲祠突厥將入寇必先詣神祠祭酹求福因牧馬料兵而後渡河

連雲堡

唐德宗貞元三年吐蕃陷連雲堡涇西特連雲堡為斥
堠連雲堡既陷西門不開門外皆為虜境樵採路絕

四都護府

唐依漢法于四邊立四都護府所以鎮重邊陲招徠殊
俗安東都護府在營州東界至洛陽二千九百里安南
都護府在交趾至洛陽七千二百里安西都護府在龜
茲至洛陽八千三百里安北都護府在雲中至洛陽二
千二百里

三受降城

見地理地

瀚海登相

外夷火州地皆沙磧若遇大風則行者人馬相失夷人呼為瀚海宋史云沙深五尺不育五穀沙中生草名登相收之以食

天山席箕

述異記席箕一名塞蘆生北胡可為蘆古詩千里席箕

草薛道衡詩秋靜見旄頭沙遠席箕愁

造陽與胡

匈奴傳漢棄上谷之斗辟縣造陽地以予胡注云斗絕也辟曲也言縣之斗曲入匈奴界者其中造陽地也晉太康地記秦塞自五原郡北九十里地名造陽

馮翊居羌

晉江統徙戎論漢建武中馬援領隴西太守討叛羌徙其餘種于關中居馮翊河東空地數歲之後族類蕃息

且苦漢人侵之由是羣羌叛亂覆沒將守屠破城邑十年之中夷夏俱弊

籌邊樓

唐文宗元和中李德裕為西川節度使蜀自南詔入寇一方殘弊德裕至鎮作籌邊樓圖蜀地形南入南詔西達吐蕃日召父老習邊事者訪以山川城邑道路險易未踰月皆若身嘗歷涉樓在成都府西

備邊庫

唐代宗會昌中李德裕又置備邊庫令戶部歲入錢帛十二萬緡匹度支鹽鐵歲入錢帛十三萬緡匹明年減其三分之一凡諸道所運助軍財貨皆入焉以度支郎中判之

榆溪

秦蒙恬為將北逐匈奴闢地數千里累土為山植榆為塞威震朔漠名長榆塞衛青傳所謂榆溪舊塞是也

慈嶺

天竺記慈嶺冬夏有雪有毒龍犯之則風雨晦冥飛砂揚礫過此者萬無一全西河舊事其山高天生葱故名

會盟壇

壇在平涼府西北唐貞元五年築渾瑊與吐蕃會盟于此

慈悲嶺

嶺在朝鮮國平壤城東元時畫此為界

光祿塞

五原塞在延安府神木縣漢武帝使光祿徐自為出五原塞遠者千里築城列障至盧朐山因名光祿塞又哈密衛輝和爾河之東有娘子泉胡人呼可敦卜刺

和尚原

陝西漢中府鳳縣東有和尚原宋吳玠大敗金兀朮于此

四履

漢之盛時四履之地東樂浪西燉煌南日南北鴈門西

南永昌東西九千里南北一萬三千里晉承三國之後
冠帶之區盡漢故地隋之世東南盡海西抵且末北距
五原唐初分為十道及平高昌拓四鎮比之漢代南北
則同外方五百里曰邊隅又其外方五百里曰鎮畿又
其外方五百里曰蕃畿

三岡

大同府應州有三岡四鎮三岡曰趙霸岡曰黃花岡曰
護駕岡四鎮曰安邊鎮曰大羅鎮曰司馬鎮曰神武鎮

崑崙塞

東漢明帝永平中竇固耿秉劉張出燉煌崑崙塞擊破
白山虜于蒲類海上注云崑崙本山名因以為塞今肅
州酒泉郡西南山有崑崙之體故曰周穆王見西王母
于崑崙山即此山有石室王母臺

冥阨塞

汝寧府信陽縣東南有冥阨塞即春秋所謂平靖關也
有大小石門鑿山以通道淮南子曰天下有九塞冥阨

其一也大同府古豐州河西有高關塞又有柘陽塞朔州有句注塞

按視邊州

宋真宗即位語宰相曰善用兵者必相地利朕欲觀西邊郡縣山川形勝之勢可擇使按視即詔楊允恭李允則使靈夏諸州圖上形勢及還召近臣出地圖示之曰沿邊山川形勝足以控扼賊衝當諭邊城量省兵馬分屯內地沿邊冗員亦從減去庶免飛輓以勞民生

部分邊將

宋紹興六年張浚以虜勢未衰奏請親行邊塞部分諸將以觀機會上許之至江上會諸帥議事命韓世忠據荆楚以圖睢陽劉光世屯合肥以招北軍張俊練兵建康進屯盱眙楊沂中領精兵為後翼以佐浚命岳飛屯襄陽以窺中原形勢既立國威大振

願罷蒼海

漢武帝通西南夷東置蒼海北築朔方之郡公孫弘諫

以為疲弊中國以奉無用之地願罷之天子使朱買臣等難以置朔方之便發十策弘不待一乃謝曰臣山東鄙人不知其便若是願罷西南夷蒼海而專奉朔方

請棄珠崖


珠崖儋耳郡在海中洲上其民暴惡數犯吏禁率數年一反漢元帝欲發兵討之待詔賈捐之曰臣愚以為非冠帶之國禹貢所及春秋所治皆可且無以為願遂棄珠崖專用恤關東為憂

石頂原

石頂原在漢中府沔縣南宋置闕于此最為險要

石鼻寨

石鼻寨在鳳翔府寶雞縣東諸葛亮所築以拒郝昭蓋
行人自北入蜀者至此漸入山自蜀赴洛者至此已出
山



山堂肆考卷二十九